

欽
定
全
唐
文

欽定全唐文卷二百六十六目錄

新文豐出版社藏書

孫處元

重修順祐王廟碑

黃元之

潤州江寧縣瓦棺寺維摩詰畫像碑

李义

諫遣使江南以官物充直贖生疏

對成都令勸學判

節愍太子哀冊文

韋均

造像記

李孝倫

敬善寺石像銘

嚴善思

論則天不宜合葬乾陵表

公除後請習樂表

欽定全唐文卷二百六十六

孫處元

處元潤州人長安中徵爲左拾遺神龍初功臣桓彥範等
用事處元遺彥範書言時事得失不納乃去官還鄉里

重修順祐王廟碑

夫視之不見聽之不聞理邃杳冥事歸寥廓神之體也陰
陽授質天地表形妙萬物而見情滋百寶而見性神之用
也有用有體然後鏡窮達而通吉凶惟深惟幾然後繫幽
明而極變化潤州城內荆王神廟者漢高帝之從父兄也

帝唐之裔豐谷之靈鍾三才而秀出應五運而挺生夫其
文足化成武堪靜難慷慨奮發伺風俟時兆示玉雞災成
金闕一泣三靈之罷睠悲九服之無依波震塵飛亂海嶽
而騰氣龍興虎嘯乘風雲而扇威於是九四猶疑三千未
附代謀於應響之地垂命於容髮之間王洞曉龍韜宏開
鳥翼星流電激鶚視鷹揚一麾而獲馬欣三捷而強彭越
園壽春舉周殷之衆會垓下收項籍之功取臨江若拾遺
分舊楚猶摧朽深謀出於不代異績崇於一時周邵未之
方桓文安足比致君堯舜拯俗阡危大啟荆宇爰藩漢室

富陵之數蟬蛻道窮變通古今之迹是非茫昧之理遺靈
宅此歷代攸欽自昔二千石臨郡未嘗不先致饗而後莅
職前刺史東平畢構親爲祭文今刺史京兆韋銑手薦醢
醢司馬上谷成敬荷高明下濟稟乎剛克之威俊乂稱賢
當彼在官之譽抑揚治道含吐藝文溫恭儉遜總其樞正
直廉清充其用聿從烏府來佐鳳江萬里表最三台虛佇
而尚澄襟靜室攬轡中達藏往知來誠爲易道窮高極遠
不昧周經言鍾化牝之符克信懷珠之術慨祠堂之褫落
悲厥迹之堙訛迺命衆工精求班匠旋加刻削廣事雕鏤

同有子之追寫仲尼等左徹之共朝軒帝精誠通於至理
髣髴見於仙祇烟雲氣色似獲嚴凝之助日月照臨如增
降鑒之象延羣峯於戶牖遶浚壑於階墀衆聖盡臻百靈
咸暨豈止一虵爲異雙鯉見祥袁真託夢於太元鄧艾通
幽於司馬不俟四天之位寧尸八部之榮威儀悉整簫管
皆徹由是人無天札歲靡災異風雨調順穀稼熟成一邦
之氓僉荷其慶長吏顏元孫舊德名家鴻才碩學性等玉
壺之潔心同金奏之諧端右一州羽儀當代錄事參軍魏
晰司功參軍裴侑李眺等策名來仕清德莅官不虧基創

之餘彌篤敬恭之操盡申明薦咸勗至誠未窮倏忽之遊
終保清激之氣安歌兮緩節絙瑟兮鳴箎始沐藻而祈恩
便奠椒而降祉清光滿室瑞氣盈庭粵以大唐先天二年
太歲癸丑三月戊寅甫功畢夫寂然不動感而遂通極乎
幽贊之情招乎福謙之佑無方無體至變至精顯道而列
睟容興物而崇清廟事通元妙光麗自然屏翰千載舟航
萬古式揚粹烈爰作銘云

帝王興起必有藩捍非獨也周亦聞於漢於穆懿戚挺茲
楨幹拯溺救焚夷凶靜難功成不處德盛無鄰威同夏日

德侔陽春德盛伊何輔主惠民功成伊何沒代留神神道
設教聖人所服得一永符樂天招福不行而至不疾而速
利用靡窮聰明難瀆欲達吾信詞陳史祝

黃元之

元之睿宗時人

潤州江寧縣瓦棺寺維摩詰畫像碑

夫魁北藏樞秉三奇於紫掖崑西運軸森萬族於黃輿方
領圓冠棹九流而宗學海霓裳羽服乘六甲而下仙巖雖
辰像微茫不能味甘陳之識陬維宵邈不能探章亥之功

仁義與禮樂可遵未出死生之境昏默與清虛可尚纔居
天地之先且造化以六合爲功聖人以二門分教豈夫百
千萬劫量其遠近三十七品語其功業者哉況性相之微
不可以名言得虛有之妙不可以智力知三千之淨土無
邊八萬之法門虛受能住不思義解脫者也維摩詰者華
言淨名居士也沒於妙喜之國生於毗邪之域大仙那提
之子常修梵行世號白衣居士焉故總妙圓明現身方丈
無起無住不去不來空色空而取真空滅生滅而求寂滅
或歸之於無物或得之於默然邪正於是路殊語言由其

道斷居士之真宗也若乃家室不離而教傳緇服天子迴
向而身爲白衣讓金粟之尊未卽如來之位晦玉毫之相
空留長者之名亦猶百谷之王以下莫能大六虛之相居
高而自卑居士之洪謙也若乃移外方之諸佛一室規乎
四天對樂世之衆生一劫成乎七日毛孔之內鼓大海之
波濤芥子之中鬱須彌之巘嶸擲世界於恒沙之外不覺
不知攝高堂於大會之前同瞻同仰嵐風動地口吸莫以
爲難猛火燃天腹貯但聞其一居士之神通也若乃羣邪
作梗諸惡延災衆生茹焚溺之悲含識迫傷夷之患由是

騁自在之力縱無礙之威破煩惱而擊慳貪斬毒蛇而擒
醉象朦朧暫建面縛四魔智劍纔揮心降六賊故使波旬
振聾不能變帝釋之容外道摧殘不能竊真如之業居士
之威力也若乃非相成光乎是相故見於威儀無言假道
於有言方形於問答宏乞食之理須菩提但覺茫然聞宴
坐之談舍利佛不能加報摩訶迦葉息言於二乘大目犍
連吞聲於四眾亦由明鏡內鑒照之而不疲洪鐘外發扣
之而必應是以五百弟子同稱我不堪任二千門人盡得
無生法忍居士之靈辨也若乃智總大雄心行菩薩雖人

我無相以拯救爲懷憂本無憂憂凡俗之憂病本無病病
衆生之病富室貧里等資其福田酒肆姪房廣談其善誘
則知去重昏之小醫朗惠日而無私闕一中根之大莖霜
法雨而同潤居士之慈悲也若乃前際後際無昧於因緣
成時化時不違於本願光嚴悟矣行念其道場新學豁然
坐知其宿命晨持乳鉢未息麤言中設飯孟普均香氣有
疾菩薩憂惱於是併除犯律比丘疑悔由其傾蓋居士之
利益也若乃恭承父訓事方便以崇嚴瞻望母儀奉智度
而資受結齊肩於法喜坐詠宜家期上足於塵勞行同入

室因風起對共賞慈悲他日趨庭獨推誠實知識慕善道
品所有居先伴侶求真度法由其見託居士之宗黨也若
乃上棟下宇空寂爲輪奐之資淨服名衣慙媿入裁縫之
用開八正之路則衆馬交馳坐四禪之牀則身心不動智
惠之果秋垂無漏之林淨妙之花春發總持之苑禪悅爲
味詎假珍羞解脫充漿寧思玉液奏法音之樂則絲竹藏
聲燒異品之香則旃檀罷郁居士之遊處也於是隨意所
轉覺路遐通應緣而攝梁津尅濟恢勇猛之志則火闕一
生蓮廣字虛之因則水中現月法本希有若都優曇之

花道之將行大備貝多之葉舉閭浮之國土禮敬忘疲想
毗耶之人天聲塵不朽居士之遺跡也得其道者則三乘
弟子羞稱多聞行其法者則七種學人莫不愛樂是致四
天讚仰而無暇十地攀接而無階王者資而九有清羣生
聞而六念作雖驪龍改地共尊金粟之儀水土遷行長奉
寶臺之供我國家神明造物聖政調時滌瑕穢而玉鏡清
剡澆訛而撫大朴牢籠七十七代鬱映萬八千年率土之
濱固有弗慙普天之下共惟帝臣京坻積而銅爵鳴鐘鼓
和而玉羊現將益四生之福爰開十善之因精舍廣祗陀

之園列郡揚淨名之教萬姓資其分別八方暢其休明天
地平成於是乎汲引在江寧縣瓦棺寺變相者晉虎頭將
軍顧愷之所畫也爾其上纏珠斗下控金陵六代爲天子
之都三分入王孫之國禮讓流行之地英靈誕秀之鄉鷲
巖分虎踞之山鴈塔枕龍盤之水總幽閒與形勝則瓦棺
之寺焉昔有晉莊嚴淨域時梵侶以規模雖廣雕飾未周
永念粹華每疚懷於須達共成圓滿而假力於檀那凡厥
施財莫匪鳴刹顧君乃連扣資數百竿逾千萬大衆貽愕
不知其然君習氣精微洗心閑雅雖纓弁混俗而績素通

神乃白緇徒令其粉壁於是登月殿掩雲扉考東漢之圖
採西域之變妙思運則冥會能事畢則功成神光謝而晝
夜明聖容開而道俗覩振動世界謂彌勒菩薩下兜率之
天照耀虛空若多寶如來踊耆闍之地由是士女駢比擁
路爭趨車馬軒轟傾都盛集玉貝交獻須臾而寶藏忽盈
青鳧亂飛俄爾而銅山崛起納繒帛者繼踵施衣布者架
肩當鳴利而雖則可驚不崇朝而過其本數非夫精義入
神者孰能與於此乎雖江山寂寥居處緬邈年移代改留
侯歎過隙之駒郭是人非丁令化遼城之鶴由是觀其道

場妙矣謂應供而來儀牀枕儼然疑有懷於問疾目若將
視眉如忽嚙口無言而似言鬢不動而疑動豈丹青之所
歎詠相好之有靈哉頂禮者肅如在之心瞻仰者發歸依
之念信受演說之旨大布於人天住持負荷之規實存於
牧宰刺史楊令琛懷軌物之量韞不伐之才五服當列土
之榮千里負專城之寄移風易俗頻垂董相之帷揖道歸
真再擁文侯之簪長史薛宏以仁賢雅望迂德於仲舉之
輿司馬成景賀以卿相高才屈跡於士元之驥俱遊六藝
貯贏金而常滿共逢三朋攬衣珠而永悟縣令陸彥恭風

神俊邁境宇恬虛雖馴雉已彰實割雞焉用風亭月牖還
開見寶之詞石冷泉清頗恣分襟之賞修菩薩之行則仰
之彌高現宰官之身則威而不猛相門出相茲焉在茲佇
聞搏擊鵬衢栖遲鳳沼豈徒播茲風化奏彼絃歌而已哉
丞鄭孝義逸氣飛騰英懷倜儻擢命世之標幹揮舍人之
符彩我之自出鳳樓鳴五色之雛家之積善牛渚降九派
之族宏才博學再閱康成之門愛客好賢重覩當時之驛
朋友推其令譽人吏偃其高風厯州縣而暫勞獻鹽梅而
詎遠主簿于植才藝早著水鏡長懸將騁驥於高門先漸

鴻於下位尉史惟清以雍容儒雅門專秉直之風以磊落
才雄巖引乘箕之宿則知龍駒千里非黃綬之所羈鶴鳴
九臯惟青天之是矚家裘不墜望台鉉而相輝堂構克隆
見公侯而必復寺主曇影及徒衆并諸寺大德等並法身
挺秀覺意圓明屈拔提之尊號懷盛明之忍辱四十二之
賢聖接踵比肩一十八之闕一虛心持目想勇猛精進將
億耳而齊驅博達多聞與阿難而並驚言論辨了有類鵬
著體性利根更嘉鶩掘故能經行不倦拯濟忘疲模楷四
流笙簧二諦邑人左補闕馮宗右拾遺孫處元等並資忠

履孝抱義懷仁凝大江之精靈鬱高山之景行莫不衡門
育德華省馳聲或長揖九徵或光膺八命所以東南蓄寶
江左有人焉旣而道俗披誠賓僚託款濫見推於相質遠
不讓於當仁弟子謬忝詞場頻擢桂林之秀言瞻法宇早
從祇樹之遊觀泡影之皆虛悟聲色之非實雖心爲形役
而志與道俱思惟必在於佛乘夢想無忘於梵行觀居士
之跡不可思議閱居士之言得未曾有恨不親承聖旨捧
袂於不二之門躬奉尊顏跪履於大千之界託菩薩之下
位共拂天花接比邱之末行同窺聖果昔讚舞鸞之化每

有願於揄揚今從問鵬之遊豈得默而無述爾時欲重宣此義是以敢作銘云其詞曰

元氣浩浩大匠存存鎚鑄精粹折託乾坤四生有劫六趣無門愛流夕漲塵飛晝昏

其一

魏哉世雄應期來現妙矣居

士隨緣利見大庇生靈蓮荒臺殿劫塵遐邇恒沙法遍

其二

空牀寂寂虛室閑閑文殊奄至波旬遽還拔毛沃海剖芥

藏山地分珠柱天潤玉顏

其三

智惠無邊威靈具足廣延寶

座高蹈金粟振動人天津梁道俗火宅垂蔭幽徒炳燭

其四

於赫有晉像教斯傳續事

關一

矣靈儀在焉神光夕照瑞

相朝圖絕如電掣皎若星懸

其五

我皇垂拱誕膺寶位控引

四流陶鈞萬類法閭妙有靈通夢寐政事以和物無不利

其六

天陰南斗地擁東吳江山作固臺壘稱都俗富英俊人

多給孤莊嚴結構炳煥規模

其七

瞻彼邦邑媚茲寮寀化偃

一同聲馳四海冰玉常瑩松筠不改迺睠道場肅焉如在

其八

薄遊淨域永念毗耶香如致飯衣似持花嚬容示疾啟

齒降邪室懷方丈曾想無遮

其九

杳杳三界茫茫九有瞻仰

眸容思惟受手式刊貞石僉圖不朽盛烈鴻名天長地久

其十

李乂

乂字尚真趙州房子人第進士舉茂才異等累調萬年尉
景龍中累遷中書舍人修文館學士景雲初封中山郡公
開元中爲紫微侍郎拜刑部尚書卒年六十八贈黃門監
諡曰貞

諫遣使江南以官物充直贖生疏

江南水鄉採捕爲業魚鼈之利黎元所資土地使然有自
來矣伏以聖慈含育恩周動植布天下之大德及鱗介之
微品雖雲雨之私有霑於末類而生成之惠未洽於平人

何則江湖之饒生育無限府庫之用供支易殫費之若少則所濟何成用之儻多則常支有闕在於拯物豈若憂人且鬻生之徒惟利斯視錢刀日至網罟年滋施之一朝營之百倍未若回救贖之錢物減困貧之徭賦活國愛人其福勝彼

對成都令勸學判

得成都令江延調縣中子弟二十已上除其吏徭各率環刀一密布十令詣太學府司科擅賦斂錄事批放仍舉科諸生謀殺之罪

郎官上應列星惟帝稱難邑宰下宣風化得人斯委江延
材膺訓俗功寄臨人拜職周京銅章之秩六百隨班蜀國
劒門之路五千冀行鄒魯之風思變彭岷之俗上琴臺而
馴翟依石鏡而翔鸞將宏富教之宜用廣文儒之業爰調
子弟是蠲徭賦環刀密布聚糧求任土之資裂裳負笈函
席就橫經之道惜乎英靈莫嗣曾靡尚於摠衣剛悍猶傳
遂有歌於剗刃不漸文翁之化有逾原壤之愆擅賦之條
在江延之何負謀殺之狀顧諸生而已彰上藩之斷頗乖
錄事之批爲得

節愍太子哀冊文

維景雲元年十月朔日節愍太子梓宮啟自鄆杜粵某日
將陪窆於定陵禮也蜃衛初列鳳仙將遠閱少海而不留
赴窮泉而莫返皇帝懷副君之大義降猶子之深慈飾忠
烈於逝者備哀榮以送之漢幄虛侍周牆肅事思臺空築
幽埏永閼金相兮玉裕揆行兮旌能峻節兮無泯芳聲兮
有恒其詞曰

素雲流祉白水貞祥祀及百代威加萬方勅焉家國赫矣
皇王帝子攸降乾男以將邁德誕靈懷文抱質漢臺占雨

秦宮近日敏對不羣能言罕匹藝該百變詞含六律朝霞
自舉夜月嘗遊醴薦推穆書成重鄒典戎仙衛作牧神州
是謂元子光膺孟侯少陽正位太學知道春誦夏絃尊師
敬老榮承玉七寵殷瑜珮三善不忘四章旋逮過闕則下
入廟斯趨曰仁與孝終始不渝聖敬日躋溫文歲廣望高
周副才優魏兩周事有倫出言無黨政成中外聲溢天壤
邪臣作蠱匹夫知惋不顧身尤將夷國難忠義斯仗謀猷
是斷獲戾宮朝歸魂霄漢白駒過隙蒼蠅止藩水逝西沼
霜彫北園鶴闕誰馭鳩里徒冤瞑目於此傷心詎論嗚呼

哀哉去日淪暉前星墜彩形神湫謝德音如在物是人非
年移運改聖朝廷鑒徽章有待有待伊何慶逢開闢延鑒
伊何恩隆典冊卽鳴鳳之岡嶺啟占烏之隧宅人辭中壘
之桑鳥思平陵之柏地如伊水山連紀市嗟委化於仙期
欲問安於神理五營成列萬國咸酸挽鐸朝暘旌麾曉寒
指牽牛以南渡乘飲龍而北徼顧青舍兮非春掩元扉兮
大暮昔之來矣銀榜銅樓今之往兮曠野荒邱冉冉兮辰
促蒼蒼兮道悠惟聲華與純懿比金石而恒留嗚呼哀哉

韋均

均長安中官雍州富平縣丞

造像記

原夫六塵不染五蘊皆空將導羣迷爰登正覺大雄見世
既開方便之門真諦乘時更顯因緣之路是以耆山廣演
火宅斯分給園宏誓樊籠自釋聖人之德不可思議弟子
通直郎行雍州富平縣丞韋均比爲慈親不豫敬發菩提
之心今者所苦已瘳須表證明之力遐徵琬玉近備雕鐫
謹造像一鋪敬爲銘曰

大哉至聖妙矣能仁濟世無德歸功有因潛開覺路暗引

迷津願迴光於孝道永錫壽於慈親

李孝倫

孝倫武后時守記室參軍事

敬善寺石像銘

若夫銀枝毓祉締靈影於金園劒雨銷氛飛惠液於沙界
自鶴林祕彩鷄山蘊迹甄睿像於貞金刊瑞容於芳琬風
猷不墜繫此賴焉紀國太妃韋氏京兆人也茗姿含綺霏
華椒掖蘭儀湛秀緝美蘋隈而思惕紅沙浪真輝於五劒
神棲縞霧延妙業於三珠爰擇勝畿聿修靈像質融虬彩

影襲鸞鵞月逗仙河分紫眉而汰色星流天苑翊紺瞳而
飛照懇誠已罄茂績其凝化鳥旌越海之功藏龜彰拔塵
之果昭昭峻業難可名言者哉闕一字疑石疏基均霜表
地川潔桐園之蕤風送杏巖之香雖淨鏡開金慮闕一字
於桑海宏規籀石諒終期於芥城其銘曰

二靈已散一體未融動植滋夥物象相蒙情氛委岳識浪
隨風終淪闕一字住孰亮三空大雄降迹元津斯演瑞浦澄

流祥山開巘雪童戰勝檀林翼善了義西宣妙輪東轉葉
潤攸在震區有庇望影咸圖尋光必萃粵惟德範夙探微

祕詣道雖忘瞻容乃喟珠璣褫玩銀藏傾財林中寫塔雲
外崇臺臨豪月滿映臉蓮開香烟起霧梵響驚埃南控巒
川北馳春路萬室迴矚四依輟步撫因共植披文同悟比
日長懸隨山永固

嚴善思

善思名譔同州朝邑人以字行消聲幽藪科擢第武后時
爲監察御史稍遷太史令景龍中累遷禮部侍郎善思精
天文卜相之術睿宗在藩善思言必登帝位旣踐阼拜右
散騎常侍唐隆元年鄭愔謀冊譔王重福爲帝僞制除善

思禮部尚書事覺配流靜州赦還開元十七年卒年八十
五

論則天不宜合葬乾陵表

臣謹按天元房錄葬法云尊者先葬卑者不合於後開入
臣聞葬則天太后卑於天皇帝今欲開乾陵合葬即是
以卑動尊事既不經恐不安穩臣又聞乾陵元闕其門以
石閉塞其石縫隙鑄鐵以固其中今若開陵必須鑄鑿以
神明之道體尚幽元今乃動眾加功誠恐多所驚黷又若
別開門道以入元官即往者葬時神位先定今更改作爲

害益深又以修築乾陵之後國頻有難遂至則天太后權
總萬機二十餘年其難始定今乃更加營作伏恐還有難
生但合葬非古著在禮經緣情爲用固無定準況今事有
不安豈可復循斯制伏見漢時諸陵皇后多不合葬魏晉
已降始有合者然以兩漢積年向餘四百魏晉之後祚皆
不長雖受命應期有因天假然以循機享德亦在天時但
陵墓所安必須勝地後之允嗣用託靈根或有不安後嗣
固難長享伏望依漢朝之故事改魏晉之類綱於乾陵之
傍更擇吉地取生墓之法別起一陵旣得從葬之儀又成

固本之業臣伏以合葬者人緣私情不合者前循故事若以神道有知幽途自得通會若以死者無知合之復有何益然以山川精氣上爲星象若葬得其所則神安後昌若葬失其儀則神危後損所以先哲之範具之葬經欲使生人之道必安死者之神永泰伏望少迴天眷俯鑒臣言行古昔之明規制私情之愛欲使社稷長享天下乂安凡在懷生孰不慶幸

公除後請習樂表

臣伏見太常奏公除後請習樂以供郊廟享祀奉勅不允

臣與眾官詳審以爲樂音氣化所以感天地動鬼神調五行均四序故哲王垂制被之樂章六變而神祇降饗九成而祖考來格今陛下以服未一周久停六律稽象德於太廟寢祈福於近郊何以昭永厯於上元助成功於先聖考之典禮恐或未安臣以漢魏喪禮以日易月者蓋爲三年不爲禮禮必壞三年不爲樂樂必崩是也以樂因陽來禮由陰作樂崩則陽伏禮廢則陰愆風雨或違災盛遂闕豐潔之祠有謬兆庶於是不安所以變諒闇之舊儀遵適時之新禮斯實存至公於天下割巨痛於私情祈社稷之永

安庶宗廟之長享孝道之大何以加之使漢魏之禮未然
則當自我作古況其得禮之變詎可越而不從伏請依太
常所請許其教習

欽定全唐文卷二百六十七目錄

崔琬

劾宗楚客等疏

嚴識元

對本正爲主判

潭州都督楊志本碑

徐嶠

金仙長公主神道碑銘

并序

洛州帖

岑義

爲敬暉等論武氏宜削去王爵表

盧甫

論突厥疏

置都督不便議

對築牆判

徐彥伯

南郊賦

汾水新船賦

登長城賦

中宗孝和皇帝哀冊文

樞機論

同韋子遊神泉詩序

辟閭仁諝

明堂告朔議

欽定全唐文卷二百六十七

崔琬

琬中宗朝官監察御史

劾宗楚客等疏

臣聞四牡項領良御不乘二心事君明罰無赦謹按兵部
尚書同中書門下三品宗楚客侍中紀處訥等立性險詖
志越溪壑幸以遭逢聖主累忝殊榮承愷悌之恩居弼諧
之地不能刻意砥礪憂國如家微效涓塵以裨川嶽遂乃
專作威福敢樹朋黨有無君之心闕大臣之節潛通獫狁

納賄不貲公引頑凶受賂無限醜問充斥穢行昭彰且境外之交情狀難測今娑葛反叛邊鄙不寧由此賊臣取怨中國論之者懼禍以結舌語之者避罪以鉗口但晉卿昔居榮職素闕忠誠屢抵嚴刑皆由黷貨今又叨忝頻沐殊恩厚祿重權當朝莫比曾無悛改苟徇贓私此而可容孰不可恕臣謬參直指義在觸邪請除巨蠹用答天造楚客處納晉卿等驕恣跋扈人神同疾不加天誅詎清王度並請收禁差三司推鞠

嚴識元

識元武后朝官魏州刺史後爲兵部郎中

對本正爲主判

婦人聞人死無親族兄乃爲主本正亦爲主鄉
人弔者兄拜爭爲主

闕

洪波振海終不到於蓬瀛流電促人詎有固於金石無不
魂遊北斗水閱東川咸促半夜之山共盡明朝之露聞人
不幸一去無歸洛川之風雪共銷陽臺之雲雨俱霽泉門
永閉但聞松柏之聲總帳空懸無復綺羅之色惜乎丈夫
獨立親屬茂如秋蘭匪植於庭砌春華詎榮於棣萼眷言

爲主寂寞無人切哀痛於仁兄慟悲涼於本正爭承卽禮
競執喪儀未終白鶴之榮詎盡青蠅之哭縣司直申情理
非究禮經徒開弄法之門未杜簿書之路竊尋州斷實允
公途以鄰主喪雅叶春卿之禮捨兄於罰殊乖秋典之文

潭州都督楊志本碑

惟天子主萬邦家六合内有百揆四岳外有州牧侯長所
以奉若天道綏厥兆人潤飾宏業光發徽頌昔漢宣帝憫
嘆息之聲晉武皇緝垂拱之化以爲統世御俗政平訟理
與我共此者其惟良二千石乎於戲楊公德邁其職振文

翁黃霸之風粹迪郭賀賈琮之道精底慎財賦而行其禮
典肅恭明神而敬事耆耄旌別淑慝俾克畏慕可謂其庶
乎博施於人而能濟眾者公諱志本字文範宏農華陰人
也其先出自周姬有伯僑者享封於晉食邑於楊命氏立
宗權輿自此矣夫涇源濬泉則派流括地盤基窮麓則峯
岑入天是以德富者其胄露繁英多者其族雲蔓故朱輪
渥彩通侯震於十人白環深慶太尉傳於四葉天才雄逸
自得曹植相推地望增華恥與王珣爲比曾祖晉陳內使
舍人臨海王府長史開蓬蔣遂交愛等九州刺史武康節

公隋贈上開府儀同三司青冀等五州刺史有集行於代
有詩入文會集精詞偉賦詭豔瑰音偶鄒陽之曳門代徐
邈之居省割珪符於比景異俗知歸聞鼓吹於中霄累朝
加贈大父林甫陳貞威將軍廣州都督隋上開府儀同三
司渠芳等五州刺史上郡北平等五郡太守皇朝營州總
管絳州刺史上柱國宜春郡公邑五千戶自吳飛楚聲軼
湛盧從趙入秦價先和氏江南舊國委崇章於大樹關右
新君延茂秩於開府旣而隋綱就弛唐讖行徵公坐聽虵
分暗期龍躍同荀彧之去紹來議深根等馬援之辭器歸

陳聚米高祖神堯皇帝深多決勝實念疇庸冊命且隆法
三光而析壤循良是屬寄千里以專城烈考琮皇朝秦王
府庫直太宗文武聖皇帝贈感舊賦一道詩三篇歷茂梓
二州長史沔綏二州刺史上柱國叶贊經綸預參康濟耿
純自結早申獻帛之誠吳質舊遊時蒙枉騎之眷幡旗長
戟門巷紛紛芝蘭玉樹階庭韡韡公吸太和之英液稟高
明之淑氣松骨始萌早抱淩霜之操瑤精在璞更爍成虹
之彩岐嶷自深惟友惟孝蒸蒸然純至日茂豈待乎浸潤
之功而後滋也年甫六稔卽丁內艱號不輟聲泣下成血

絕漿絕粒毀劇成人大連少連曷云克邁自是名韻激射
藝實汪洋希風者刮聽而彌仰挹道者洗矚而欣契杜安
登學貴戚咸遺其書王粲在門中郎遽倒其履格不期峻
而且高標削成量不期深自有天琛水怪施之於夏屋則
可以灑桷編櫨排之於大川則可以衝濤截波矣年三十
以右親衛調補石州司法參軍鵬圖未聘鴻漸初升惟敬
五行以成三德習于公之待封憲陳氏之特寬樓煩之南
咸知審克離石之境自以無冤轉桂州都督府法曹參軍
清棘犴察梧囚明慎用法而不留獄都督周道務以公冰

襟同潔石性渾堅庇惡木而深恥飲貪泉而不易奏充嶺

南市閭

闕一字

珠玉使僣僣五嶠皇皇百越路窮南服境淑

西屠握水衡之錢權御府之產厯剖蚌泣鮫之巨漲窺結
綠珊瑚之怪穴自異時魁傑之士以事而臨其地罕有聲
背於黷節全其貞將軍北旋猶見猜於薏苡大夫南使亦
受遺於金裝而公散國財市蠻寶混之不濁涅而不緇易
生人之所難凜然有伯夷之風矣以外憂去職百里而趨
三年無改長輿哀苦國主念以增憂次翁服竟郡守逼而
方釋服闋授始州司法參軍公九章惟精故三政居里小

大必察洽於人心紫蒙軍大使駙馬周道務奏充營田判
官考蠶畚相墳衍申李悝盡力之教行商鞅急耕之賞候
采落花動深曳棘故軍賴滋殖人無阻饑轉揚州高郵縣
令加朝散大夫遷雍州吳原令道德齊禮風移俗易野瞿
依馴災蝗折去鑠庫兵以爲器彈鳴琴以坐堂淮海之邦
衆斯悅矣奏雍州司士闕邑人斯附矣遷邛州司馬兼平
戎軍靈關道支度運糧使七羌九兵時間暴梗徵師練卒
式張威防密徑通蜀窮關抵駟厯嚴道之邛峽綠漢嘉之
折坂滑壤沮塗且疑泉覆淫澍不開莫殊天漏公審量中

算廣蓄邊儲率擔夫竦餽卒膺隙墮腹陘危魚頡鳥頡輻
輳不絕軍戎以濟豈慙流馬之功才幹方申猶兼展驥之
任轉始州長史限以劍閣阻以石門張載勒銘之所范睢
通棧之地邑戶遷逃鄜里疎寂版籍徒紀征賦缺如公綏
之斯懷集之斯至墳無輟享之鬼家有戀本之夫邦國不
空旣賴王祥之績吾無憂矣實惟蔣濟之能制公檢校棣
州刺史俄而東胡叛換北狄猖狂鶚鈔虎飛海蹙雲沸殘
破城邑殺略吏人激傷血於燕冀鋪割胔於恒碣兩河之
土崩矣百姓之心搖矣則天皇后有命分麾寘懷撲燎班

告羣后時惟念哉公拜書而泣杖節雷毆申畫郊圻慎固
封守威以震敵惠以保毗故得境內無柝聲野外無塵影
猶祭彤之有勇虜不敢窺若李廣之能飛寇恒警避賊平
授使持節蘄州刺史蘄州蕪迴楚風輕亟礮連黃石之山
江帶青林之浦公敷國典灑朝恩斟化源撰猷懿鎮動以
德闔郡知方息競以義眾事攸敘貪殘盡去自使乳虎浮
江災疫不生卽有牽牛入界尋除都督潭衡等七州諸軍
事潭州刺史建麾涉境先求異行停輿決訟應變如神興
廢唯降其一書得失每詢於三老且青陽舊城白鷺通浦

控引江嶺括集山谿交貿所競冠蓋斯雜示之以無欲盜
子悅化以歸農激之以至淳浮客感攜而請賦故年景未
及於周次風化穆著於衡湘矣公以老浸生危官疲神耗
深惟退身之誠頻奏乞骸之表制曰潭州都督楊志本厯
官歲久懸車禮及宜遂請老之誠以就歸閑之美可聽致
仕於是高謝方鎮卷懷條察俶圖輕舸特去江潭言念安
車展游田里而災禽集舍息馬歸山長沙捐壽昊天不弔
維長安四年秋八月十七日薨於州館享年七十有七號
黎沸境慟庶萋庭莫不若喪慈親願行衰經雖倉慈旣歿

激深慕於圖形郭伋云亡注隤思於配社亦茂茲尚矣惟
公姿範端凝精符朗秀器含經濟而緯以斯文才抱圓通
而幹以洵直宏虛受以廣納資用晦以沖謙遊其域則童
幼警其卑野賤忘其簞泳其波則驕伐以酌損剛戾以克
柔瑰節霜明偉尚煙竦橫德輝以爍邦族鏘嘉聞而滿區
縣學成淵海隔風雨而恒觀辨若奔濤鑄鍵機而不發常
慕汲黯寧爲管仲維迹在公匪懷私已率誠任道深析利
物位愈高而魂益厲績旣凝而心更勤食不貳味居不重
席俸祿必散於孤親車馬共敝於同友實漢元以來未有

可若斯人也夫人昌寧郡君河南長孫氏周尚書左僕射
鄒國公儉之孫也體備柔閑道鍾清懿言而可式動必由
禮纖累不挂於心浮僞豈迴其首肅侍巾櫛勉執紘綆邈
邈承姑獲筐蘭而必獻拳拳訓子見俎豆而斯寧義渥旁
周仁光下逮允釐中事載穆其序端儀麗軌抑不可選歟
悲夫朝露未晞雲無處所同辟司徒之室初得賜封在季
武子之階終聞許合以大足元年卒於蘄州官舍春秋六
十九粵神龍元年八月二十五日合祔於咸陽舊塋禮也
田疏畢陌樹鬱平陵立石前傾依然哭鳥之象野墳旁野

別爲埋鹿之標有子前永州司功景前左勳衛鉉等鳳毛
齊整麟角早成孝思旣深觀行無缺勤兼叔度遙迎蜀漢
之喪潔比濬沖不受源州之贈封樹畢矣晨昏已矣永言
報之誠罔極矣將憲乎銘鼎景鍾之迹茲所以昭德紀功
之義迺虔集洪懿俾勒於翠石敢旌不朽焉其詞曰

龜文爍電龍友先風三軍可指千里易窮疇克光配洪惟
我公侯宗磊落襄系豐融世有象賢門傳清白牧守連起
采章重赫義叶奉圖寵深同席德邁不匱慶流斯積昭哉
嗣服穆穆厥聲恪慎克孝資忠以貞回涯江滙朗節霜橫

儒林直秀吏道旁精爰視決曹志清叢棘人有哀淚形無
愠色肅傳皇皇飲冰翼翼屢酌貪水寧罹譖惹典農燕塞
轉食邛郵稔應銅雀邛來木牛自此康海旋移蔣州人安
偉化虜懾雄謀昔離斬服去思猶詠今鎮湘潭來歌轉盛
府吏歸殖江神斷娉辭懇今行思愈謝病如何迅息不享
期頤鷹隨牽旒虎送還輜短矣清室孤魂久嫠旣詢鄒母
雙棺合茲潸昧真宅穹崇邱冢客土新封行椒舊拱惟哲
嗣令精孝泣昊天兮思重仰構代兮昆吾琢貞石兮岑竦

徐嶠

嶠新唐書作嶠之

字維嶽贈吏部侍郎師道子歷趙湖洛潤三州

刺史入爲中書舍人大理寺卿贈左散騎常侍

金仙長公主神道碑銘并序

臣聞昌容駐齡入遊恒岳觀香飛解受道緱山皆名列仙

下咎繇之懋功承元元之上德故真氣全於乙妹道闕一字

播於下闕高宗天皇大帝之孫睿宗大聖真皇帝之女我開

元下闕彤闈夙承訓於姒則生知女範少協成人兌悅其儀

居無下闕先帝之龍潛藩邸公主以王女受封蓋齟齬之時

下闕先帝尚其誠心不奪雅志以丙午之歲度爲女道士闕一

字衣下姜鳳凰樓中聞學簫之秦女屬先帝席圖御極翼

下邇鄰鳳城銅闕巍峩豈惟南裔之域銀題赫奕何間西

州之宮下氣將巽風不散故得佩王母之秘籙呼玉女之

字闕一辰既下邑一千四百戶雖湯沐增賦貴盛當時而珠

玉滿堂賤之莫闕一獨下彰寶厯而應天極麗窮神以宴

以處豈不謂高其節行寵其下委氣大塊休躬天鈞齊彭

殤於不天泯貴賤以同塵冥下至如元母七寶之胎王母

四童之藥咸標上訣不闕一停下形於東都開元觀春秋

卅有四主上以天倫之闕二傷下葬踰於吳國闕一筮年

尚遠權窳伊洛今龜言既

闕一字

陪葬

闕下

喜縣開國男裴允

初備監護之儀銀青光祿大夫將作大匠上柱國

闕下紫氣

迎於函谷白鶴送於緱山瓊鳳哀鳴咽薤歌而欲絕黛雲

闕下留跡徒聞

闕一字

斗而飛去幾劫仙羅之拂石乃爲銘曰

數首虞妹娥皇帝子傳載封陳詩歌穠李歲蕤九

闕一字崑

耀百里比

闕下

水豈學平陽

二章

育性閑婉韞暉元默匪傲榮

貴常棲道德

闕一字

縣

闕下

降月元女排煙羣遊瓊圃序業金

編章二京樂土雙

闕一字

藥

闕下

大數萬物同鑿奄示長息脩

然解攜園基柯爛椿菌年齊

六章

勵切旒

闕下

伊洛之閒歲叶

先遠陪葬橋山東辭鼎邑西度函關巽風下靈妃時過仙
侶九章泉燈一閑兮無光壽陵萬古今相望金鼎玉關一今
字

閣下

洺州帖

春首餘寒惟闌梨動止安隱弟子虛乏謬承榮寄蒙恩獎
擢授洺州一歲三遷自南徂北旣近都邑忝竊彌深戰懼
之時慙惶失據便卽祇命末由頂謁瞻望山門但增悽斷
願珍重忽忽不宣弟子徐嶠和南

岑羲

義字伯華侍中文本孫第進士累遷太常博士神龍初拜中書舍人坐爲敬暉草疏請削諸武之爲王者左轉祕書少監進吏部侍郎右散騎常侍同中書門下三品睿宗立出爲陝州刺史復歷刑戶二尚書遷侍中先天元年坐預太平公主謀逆誅

爲敬暉等論武氏宜削去王爵表

臣暉等言臣聞神器者天下之至公必歸於有德皇極者域中之大寶必順乎天命厯考前古詳觀帝業皆不並興莫不更王故三皇氏沒而五帝氏興夏殷氏衰而周漢氏

作何則帝王之厯數必應乎五行水盛則火衰木衰則金
盛天地之運也必合乎四時春往則夏來暑退則寒集則
知五行之數帝王不可違違之則宗社不安生人不理四
時之序天地不能變變之則霜露不均水旱交錯自有隋
失御海內崩離天厯之重歸於唐室萬方樂業荷撥亂之
功三聖重光布生成之德可謂有功於四海有德於蒸人
自宏道遇密生靈降禍百姓哀號如喪考妣則天皇帝臨
御帝圖明目達聰躬親庶績則有讒邪凶孽誣惑勳德構
害宗枝誅夷殆盡英藩賢戚百不存一餘類在者投竄荒

裔冤酷人神感傷天地忠臣義士實所痛心自天授之際
僭稱改革武家子姪咸樹封建十餘年間實亦榮極時唐
室藩屏豈得並封故知事有升降時使然也今則天皇帝
厭倦萬務神器大寶重歸陛下百姓謳歌欣復唐業上至
卿士下及蒼生黃髮之倫童兒之輩莫不歡欣舞抃如見
父母豈不以唐家恩德感幽祇之心陛下仁明順天下之
望今皇業重構聖祚中興神祇之道有助於先德矣黎人
之誠無負於陛下矣臣又聞之業不兩盛事不兩大故天
無二日土無二王前聖之格言先哲之明誠自皇明反正

天命惟新武家諸王封建依舊生者既加茅土死者仍追
賦邑萬姓失望卿士寒心何則開闢以來罕有斯理帝王
之道實無此法陛下縱欲開恩以行私惠豈可違五行之
厯數乎乖四時之寒暑乎又海內眾情朝廷竊議爲武氏
諸王身計亦適將有損何則處之未得其所居之實恐不
安陛下雖欲寵之翻乃陷之不遵古典故也且唐厯有歸
周命已去爵重則難保祿薄則易全又則天皇帝親政之
時武氏諸王亦分外職今並居京輦不降舊封天下之心
竊將不可陛下縱欲敦崇外戚曲流恩貸奈宗廟社稷之

計何奈卿士黎人之議何伏願陛下爲社稷之遠圖割私情之小愛內崇經邦之要外順遐邇之心豈不固宗廟之本允人靈之願則陛下巍巍之業貫三光而洞九泉親親之義上有倫而下有序臣等特承榮寵思竭丹衷旣爲唐臣實爲唐計伏乞聖慈俯垂矜納

盧備

備中宗朝爲右補闕遷祕書少監開元時爲修圖書副使

論突厥疏

臣聞有虞咸熙苗人逆命殷宗大化鬼方不賓則戎狄交

侵其來遠矣漢高帝納婁敬之議與匈奴和親婁以宗女
賂以巨萬冒頓益驕邊寇不止則遠荒之地凶悍之俗難
以德綏可以威制而降自三代無聞上策今匈奴不臣擾
我亭障皇赫斯怒將整元戎臣聞方叔帥師功歌周雅去
病耀武勲勒燕山則萬里折衝在於擇將春秋謀元帥取
其說禮樂敦詩書晉臣杜預射不穿札而建平吳之勲是
知中權制謀不在一夫之勇其蕃將沙吒忠義等身雖驍
悍志無遠圖此乃騎將之材本不可當大任且師出以律
將軍死綏秦尅長平趙括受戮胡去馬邑王恢坐誅則棄

軍有刑古之常典近者鳴沙之役主將先逃輕挫國威須
正邦憲又其中軍旣敗陣亂矢窮義勇之士猶能死戰功
合紀錄以勸戎行賞罰旣明將士盡節此擒敵之術也臣
聞以蠻夷攻蠻夷中國之長算故陳湯統西域而郅支滅
常惠用烏孫而匈奴敗請購辯勇之士班傅之儔旁結諸
蕃與圖攻取此又犄角之勢也臣聞昔置新秦以實塞下
宜因古法募人徙邊選其勝兵免其行役次廬伍明教令
則徃習戎事究識夷情其所虜獲因而賞之近戰則守家
遠戰則利貨趨赴鋒鏑不勞訓誓朝賦楊柳夕歌杖杜三

年之後可以久安臣聞漢拜郅都匈奴避境趙命李牧林胡遠竄則朔方之安危邊域之勝負地方千里制在一賢其邊州刺史不可不慎擇得其人而任之蒐乘訓兵屯田積粟謹設烽燧精飾戈矛來則懲而禦之去則備而守之此又古之善經也去歲亢陽天下不稔利在保境不可窮兵使內郡黔黎各安其業擇其宰牧輕其賦徭事無過舉爵不以私愛人之財節其浮役惜人之力不廣臺榭察地利天時以趨耕獲命秋獮冬狩以教戰陣則數年之後有勇知方帑藏山積金革犀利然後整六軍絕大漠雷擊萬

金匱要略卷之二十一
里風掃二庭斬蹕林之首懸藁街之邸使百蠻震怖五兵
載戢則上合天時下順人事理內以及外綏近以來遠以
惠中國以靜四方臣少慕文儒不習軍旅奇正之術多愧
前良獻替是司輕陳瞽議

置都督不便議

牧伯之命非不古也洎漢襲秦罷侯置守方制萬里以綏
兆人今出王庭威行郡國南海興利東海詳刑人以阜安
其流多矣至漢武帝初置刺史秩六百石掌察墨綬以下
其黃綬以上則不察焉所以全長吏之威行不擾之政也

至漢成帝改置州牧秩二千石遂以秩高自守而功業不著於是罷州牧又置刺史及東漢之時復置州牧王綱不振浸以陵夷則事之汙隆詳乎典策今天下諸州分隸都督專生殺之柄典刑賞之科若委非其人授受有失權柄既重疵釁或生又非強幹弱枝經邦軌物者也其新置都督事恐不便今巡察御史秩卑任重御史之流也委以時巡奸宄自禁伏請慎考古道率繇舊章法乾元之簡易守前王之令典俾夫化洽昇平務依貞觀制度矣

對築牆判

洛陽縣申界內坊牆因雨頽倒比令修築坊人
訴稱皆合當面自築不伏率坊內眾人共修

帝王是宅河洛之陽雲闕巖巖列綺城之萬雉環途隱隱
分體國之九經重開交關樓臺相距屬陰風迴扇累日沈
輝灑洪雨於四溟布族雲於千里煙凝萬井萍汎中衢半
露官牆坐見室家之好全頽環堵行瞻湫隘之居且揆務
黃圖參榮赤縣理雖謹察故典遵牧黎人必使溝洫廣開
垣牆甚厚因茲法令正叶隨時坊人以東里北郭則邑居
各異黔婁猗頓乃家產不侔奚事薄言佇遵恆式旣資眾

力須順人心垣高不可及肩板築何妨當面

徐彥伯

彥伯名洪以字顯兗州瑕邱人對策高第累擢職方員外郎奉迎中宗房州既踐位進太常少卿修武后實錄封高平縣子歷衛州蒲州刺史擢修文館學士工部侍郎轉太子賓客開元二年卒

南郊賦

維帝唐八十有五載鴻徽鑠於縣寓騰陽精握機矩還攝提以產氣配神明而作主倬四后之在天伊萬物之胥覩

左日壑右星圃吹烈火於炎邱覲堅冰於委羽莫不匍匐
我聲教駿奔我珪組納大荒之管鑰伏堪輿之扃戶茲可
以孩黔羸扶盤古苞混茫而首出亦奚云於三五哉於穆
我皇纂戎而昌青氣搖社白雲入房與天地合契與日月
齊光杖太一毆羣剛共工戮兮河嶽正旬始滅一作三兮

苗格

今

星辰張輯稽古之禮物懸象魏之舊章雖配天復禹繼嗣
興湯者不其懃歟肇允神聖浸發葆命芬德馨香崇庸祇
敬吟蓼蕭以游渥合臬桑而蘊正關石鰈鈞飛沈翔泳擇
明居之全法撰蒼渠之闕令則太階平而玉衡正也庶績

洪疑賡歌浩作陰騭於下有孚煥若恢負勝之圖賁昭功
之籥是以元龜遊乎湍瀨丹鳥吟於觀閣芝房菌蠢而玉
英景雲璀璨而金萼雙觥共抵之獸躑躅苑山一稔二米
之穎紛拏畎壑邦誦中和毗歌小苾歲合作噩日交長至
邁朔旦之明期擇純陽之正地欲陳大旅展時事告紫宙
之成功定皇天之寶位蜃鷺司典鳴鳩葳職崇泰壇考星
翼畫八卦以通道錯五行而辨域對越精祇森羅正直木
巽火而殷薦豫乘雷以罔極載師清野土訓掃塵繚垣虹
合參途電聯籠組帷以艾景覆皇邸以慶煙宮伯糾其禁

內饗烹其蠱周廬攢搆以戢晉列蘇抗莖而翩綿繩繩都
人濟濟多士九牧之守百蠻之子莫不挈鴈提羔攢驂噓
軌紛鴻浴以騰逗叛適皇而怡儼或駢肩而側足候吾君
之戾止若葵藿之傾離光同江河之赴溟水也然後啟端
門警仙蹕雙鳳矯首六龍齊膝青旆胷雲紅旌彗日鏘玉
鸞之鳴轍按金雞之廣術傳畫角以啾嘈曳朱旗以駢坐
呵風伯令戒道制元冥使司律此靈祇所以保綏皇天所
以宥密於是闢龍次幸蜺幃鵜鳥司襄熊羆奉收皇帝乃
彰畫黻襲大裘端玉珽肅珠旒翼翼穆穆遂臻於園邱躬

孝享擁神休設天宗之六席援長發之二球盥以明水薦
以香羞陳蒼璧而咸事藉白茅而闡幽絜駢旌之泔淡酌
元瓚之觶醕盛哉坤極順天樞見邸乳祥開會沙業薦赫
禮數於彤壺布徽音於紫縣率先於金簿之蠶謹覆以瑤
筐之鷺皇后介禮恭茲亞奠凝億兆之歡心注穹蒼之景
眄紫微開兮天香滿神之來兮軒星纂候黃鍾兮雪飛調
大呂兮風煖夏雲和之寶瑟吟孤竹之清管石麟天矯團
翠煙而上征蕤鳳習霍迓鴻釐之無算瑞氣蜿蜒於藪甸
祥光熠爚於旄罕三觶終獻萬祇呈醺昇羽節導靈羣凝

欽定全唐文

卷百六十七

徐彦佐

九

肆夏以青舂颺登歌而咽雲微鸞鷟之颯沓致戩穀之綱
緼禮畢功成天旋日轉宸儀允穆后庸胥展引大火之流
旂迴夷庚之翠輦倪三巒之崇構御六氣之遙辨覽太元
之神策張集靈之瑞典草木亨兮雷雨霽霽湛恩灑兮雲
霄靈霽壽觴霞舉兮絲竹龢筐筐岳立兮駢差戔天子方
合符於大庭之國錯事以梁父之阿岱崩疑兮青嶂汶泓
澄兮紫波屯千轂以霆轉整萬轡而星羅則述易象者獻
風行之絲談比興者奏時邁之歌蕩蕩乎巍巍乎無得而
名言矣遂作頌曰

煌煌靈臺告成功兮我君孝享亞坤宮兮純嘏布濩延皇
穹兮惟策代表謫升中兮享壽千億傳無窮兮

汾水新船賦

以虛舟濟物利
涉大川爲韻

賢者徹侯求人之莫分帝之憂以爲冀方輪轉病於行軸
乃乘素秋鏡清流假道於河伯息肩於吳牛因去彼以取
此遂舍車而造舟革故鼎新裁規創制通子房之妙畧運
宏羊之潛計測淺深之量將載沉而載浮陳去就之宜則
旣濟而未濟懿夫席帆錦纜蘭橈桂檝不日而成嘉謨允
叶蒲且罔設寧勞漁子之家財用無虧不奪農人之業水

之積也厚船之動也捷迴翔並驚識波上之雙鳧倏忽孤
飛見天邊之一葉伊負重以致遠非印否而人涉及夫安
卑委順外靜中虛混泥沙而閑矣象智者之居諸逐便乘
流排難觸物泛波濤之不屈狀勇者之拂鬱船之時義吉
無不利向之爲材也標挺特之材今之爲器也作殊常之
器若往若來無顛無躓奢淫自戒厭殷帝之酒池遊戲無
虞恥丹朱之陸地鵠首翩然魚鱗比川映汾陰之寶鼎參
漢武之樓船當秋風之櫂唱候明月以扣舷載麋儲而奉
國達方物以朝天可以通河渭可以泝涇瀾斯漸勞而永

逸將冠古而爭先且知君子攸作務於遠大美利亟行莫
不繫賴厥聲載路賁歌濟巨川之功史不絕書考課獲疇
庸之最別有荷爲衣兮蕙爲帶鼓輕柅兮張翠蓋杳渺煙
波之末夷猶區域之外願一涉於龍門接神仙之嘉會

登長城賦

班孟堅輟編史閣掌記戎幕坐燕阜之陽覽秦城之作喟
然而嘆曰傳翼下鞬視人則媮鯨吞我寶鼎蠹食我諸侯
鞭撻我上國動搖我中州所以二世而隕職此之由乎當
其席卷之初攻必勝戰則克因利乘便追亡逐北自以爲

功勤三王威懾萬國重鉄鎖干戈於仁義輕詩書禮樂於
殘賊然後馳海若以爲梁斷陽紆以爲藪犀象有形而採
掇珠玉無脛而奔走朝則貪豎比肩野則庶人鉗口負關
河千里之壯言帝王一家之有神告籙圖亡秦者胡實惜
蕭牆之變濫行高闕之誅鑿臨洮之西徼穿負海之東隅
猛將虎視焉存綱紀謫戍勃興鈎繩亂起連連塢壁岌岌
亭壘飛芻而輓粟者十有二年塹山而堙谷者三千餘里
黔首之死亡無日白骨之悲哀不已猶欲張伯翳之絕允
馳撐犁之驕子曾不知失全者易傾逆用者無成陳涉以

閭左奔亡之師項梁以全吳趨悍之兵夢驂徵其敗德斬
蛇驗其鴻名板築未艾君臣顛沛六郡沙漠五原旌旆運
厯金火地分中外因虐主之淫復成後王之要害則知作
之者勞而居之者泰歲次單闕我行窮髮眇默難田幽陰
馬窟土色紫而關迴川氣黃而塞沒調噪鼓於海風咽愁
笳於隴月試危坐以側聽孰不消魂而斷骨哉況復日入
青波堅冰戕戕危蓬隕蒂森木靜柯羣峯雪滿聯峴霜多
龍北卧而銜燭鴈南飛以渡河載馳載驟彼亭之候唯見
元洲無春陰壑罷晝鷺隼爭擊哀採直透饑鹿夜咆乳虎

晨關蟄熊舐掌寒龜縮殼悲壯圖之天過憫勞生之艱遘
昔者韓信猜叛李陵拘執望極燕臺山橫馬邑戰雲愁聚
衝飈晦急莫不陵地脈以扣心望天街以隕泣亦有王昭
直送蔡炎未還路盡南國亭臨北蠻貯漢月於衣袖裊胡
霜於鬢鬟雖寵盈氍幄而魂斷蕭關至若趙王遷逐馬融
幽放去家離土渝沙厯障夢蟪蛄之戶側坐蠓螭之塞上
桃李夕兮有所思綺羅春兮遙相望登毀垣以擗標坐頽
隅以惆悵是以衛青開幕張遼關土校尉嫖姚將軍捕虜
雍垣鋪障鉏亭伐鼓斬元於鐵防之門流血於金河之浦

張虎牙以泄憤紕蝟鬚以蓄怒及夫中郎殉節博望踰邊
取劍仆地尋河際天幽海上而萬里竄胡中而幾年銀車
浮出玉節仍旋南向國以樂只北違沙以莞然嗚呼長城
之設載逾九百古往今來歸然陳迹窮海戰士孤亭戍客
登峻墉陟穹石嗟故里而不見感殊方以隕魄者亦何可
勝道哉嗟我羈淪南庭苦辛長懷壯士永慕忠臣經百戰
之戎俗對三邊之鬼隣徐樂則燕北書生開偉詞而諭漢
賈誼則洛陽才子飛雄論以過秦歲崢嶸而將暮實慷慨
於窮塵

中宗孝和皇帝哀冊文

維景龍四年歲次庚戌六月辛巳朔二日壬午大行應天
神龍皇帝崩於神龍殿旋殯於太極殿之西階粵景雲元
年十一月二日乙酉將遷座於定陵禮也畫攢毀帟雕輶
肅輶縞紼霜迴丹旂雪引御窆臺之眇默背天閭之崇峻
皇帝瞻在原之墜響感聯萼之凋陰禮奠收兮泣遺迹同
氣訣兮悲聖心爰命下臣式揚鴻懿咨簪烈於金牒刻明
猷於玉字其詞曰

少典之子重元之孫珠聯寶系海浸昌源鳳鳥鳴國蛟龍

守門於鑠皇朕赫應成命青靄南浮彤雲北映掃刷中寓
光亨累聖欽若應天纘戎前慶身佩星斗掌提曦鏡克明
克睿允武允文就之如日望之如雲聲中律呂辭含典墳
道懋登庸榮膺繼體位擁青陸業移朱邸春誦夏絃冬詩
秋禮復子明辟固天攸啟鵬舉提象鸞飛鑿乾羅圖已御
芝璽仍傳拱默當宁賡歌撫絃堯親更睦媯德逾殫萬寶
阜成四門光闕宵衣若厲道風猶危野接翹車殿橫儒席
留連鎬譙婉孌辭客潤洽泉草

一作魚

恩周卉毳鞮譯騫輪

要荒走幣削觚反樸寬刑薄稅俗富京坻人忘疵癘帝圖

廣運天意難誣旖旎祥籙張皇瑞符仙芝抱砌神蕙搖廚
龜負綈檢麟銜斗樞孝思罔極崇庸克賽親幸國陽式陳
昭配翠輦容與蜺幃暎暖蒼壁森羅明祇肅對元經備典
洪範盈疇將竦華蓋遙封岱邱厭紫宙之阨僻追白雲之
豫遊時若慕於喪妣道空存於委裘嗚呼哀哉惟幾在辰
穆卜違吉仍几虛座綴衣空室景沴攝提悲纏翼日羣臣
奉於末命天下悲乎晏出嗚呼哀哉宗伯莅典同軌赴辰
龜謀入兆犀羈移輜喝苦挽於香掖咽酸筵於曙旻彤堦
晶晶兮露驚月玉座微微兮花掩塵嗚呼哀哉列綺城之

衰仗引滋橋之渡憶朔颼急今御道寒愁日晦今雲郊晚
駐石馬之新塗下金天之舊坂見疎杏之原長覺深松之
路遠嗚呼哀哉伊昔睿詰光謀壽宮猗那我后復幸方中
委冠劍於泉窆保明靈於昊穹山有移兮海有變道無關
今聲無窮嗚呼哀哉

樞機論

書曰唯口起羞惟甲冑起戎又云齊乃位度乃口易曰慎
言語節飲食又云出其言善千里應之出其言不善千里
違之禮亦云可言也不可行也君子不言也可行也不可

言也君子不行也嗚呼先聖知言之爲大也知言之爲急也精微以勸之典謨以告之禮經以防之守名教者何可不修其詁訓而服其糟粕乎故曰言語者君子之樞機動則物應物應則得失之兆見也得之者江海比鄰失之者肝膽楚越然後知否泰榮辱繫於言乎夫言者德之柄也行之主也志之端也身之文也旣可以濟身亦可以覆身故中庸鏤其心右階銘其背南容三復於白圭箕子九疇於洪範良有以也是以倚撫瑕玷詳黜躁競審無恒以階亂將不密以致危利生於口森然覆邦之說道不由衷變

彼如簧之刺可不懼之哉其有識暗邪正慮微形朕破金
湯之籥封禍亂之根用詒譎爲雄辯以號詼爲令德至若
梧宮問答荆齊所以奔命韓魏加肘智伯所以危殘蔡侯
繩息嬀也亟招甲兵之罰鄭曼圖宋卿也而受鼎鑊之誅
史遷輕議終下蠶室張紘詭說更齒龍泉凡此過言其流
匪一或穢猶糞土或動成刀劍或苟且其心或脂膏其吻
挾邪作蠱守之而不懈往輒破的去之而彌遠亦何異韓
盧聚音尤也羣吠得死爲幸何修名之立乎雖復伯玉沮
顏追謝於元凱蔣濟遺恨失譽於王陵犀首沒齒於季章

曹瞞辭舌於劉主當何及哉孔子曰子欲無言又云終身爲善一言敗之惜乎老子亦云多言數窮又云聰明深察而近於死者議人者也何聖人之深思偉慮杜漸防萌之至乎夫不可言而言者曰狂可言而不言者曰隱鉗舌拱默曷通彼此之懷括囊而處孰啟謨明之訓則上言者下聽也下言者上用也睿詰之言猶天地也人覆燾而生焉大雅之言猶鐘鼓也人考擊而樂焉作以龜鏡周公之言也出爲金石曾子之言也存其家邦國僑之言也立而不朽臧孫之言也是爲德音諧我宗極滿於天下貽厥後昆

殷宗甘之於酒醴孫卿諭之以琴瑟闕里重於四時郢郡
輕其千乘豈不韙哉豈不休哉但懋探大猷克念丕訓審
思而應精慮而動謀其心以後發定其交以後談不蹙趨
於非黨不屏營於詭遇非先王之至德不敢行非先王之
法言不敢道翦其纍纍之緒撲其炎炎之勢自然介爾景
福錫茲純嘏則悔吝何由而生怨惡何由而至哉孔子曰
終日行不遺已患終日言不遺已憂如此乃可以言也戒
之哉戒之哉

同韋子遊神泉詩序

美原北澗有神泉生焉裕明子明臺子尋故人韋烜因遊之烏戲泉潭虛融派流徑復信造化之極神明之儁也裕明子乃盥焉明臺子乃漱焉相視而笑曰異哉豈太平殊感而循化有助邪則韋子蓋文章之雄也昔投雅興諒無言而不酬云

辟閭仁諝

仁諝聖厯中官司禮博士

明堂告朔議

臣等謹按經史正文無天子每月告朔之事唯禮記玉藻

云天子聽朔於南門之外周禮天官太宰正月之吉布政於邦國都鄙干寶注云周正建子之月吉朔日也此卽玉藻之聽朔矣今每歲首元日於通天宮受朝讀時令布政事則京官九品以上諸州朝集使等咸列於庭此則聽朔之禮畢而合於周禮玉藻之文矣而鄭元注云玉藻聽朔以秦制月令有五帝五官之事遂云凡聽朔必特牲告其時帝及其神配以文王武王此鄭注之誤也故漢魏至今莫之適用按月令云其帝太昊其神勾芒者謂宣布時令告示下人其令詞云其帝其神耳所以爲敬授之文欲使

人奉其時而務其業每月有令故謂之月令非謂天子每月朔日以祖配帝而祭告之其每月告朔者諸侯之禮也故春秋左氏傳曰公既視朔遂登觀臺又鄭注論語云禮人君每月告朔於廟有祭謂之朝享魯自文公始不視朔是諸侯之禮明矣今王者行之非所聞也按鄭所謂告其帝者卽太昊等五人帝其神者卽重黎等五行官雖並功施於人列在祀典無天子每月拜祭告朔之文臣等謹檢禮論及三禮義宗江都集禮貞觀禮顯慶禮及祠令並無天子每月告朔之事若以爲代無明堂故無其告朔之禮

則江都集禮貞觀禮顯慶禮及祠令著祀五方上帝於明
堂卽孝經宗祀文王於明堂也此則無明堂而著其享祭
何爲告朔獨闕其文若以君有明堂卽合告朔則周秦有
明堂而經典正文並無天子每月告朔之事臣等詳求今
古博考載籍旣無其禮不可習非望請停每月一日告朔
之祭以正國經竊以天子之尊而用諸侯之禮非所謂頒
告朔令諸侯使奉而行之之義也謹議